
MUTTATAG - WIA N A BUA SIAGHT

Muttertag is
und ih gratulier!
gwaschn und gschneuzt
steh ih heut vor dir,

gkampölt und gstriegelt,
a mords fescher Bua
ih hoff, du haltst stad
und lost ma a weng zua.

Dankschön möcht ih sogn
heut am Muttertag,
weil ih froh bin um dih
und weil ih dih mag.

Weil ih froh bin dass du
net so zimperlich bist
und oiss, was ih anstell
schnell wieder vergisst:

Dös hinige Radl,
auf der Hosn den Dreck,
im Schulheft des Gschmierat,
und in Mathe den Fleck,

im Hosensack d Käfer,
unterm Bett de weiß Maus,
und den fußballhinign Rasn
gleich hinter dem Haus.

In da Werkstatt des Gwerkat,
in mein Zimmer den Mist,
Dankschön, dassd a
manchmal s Schimpfn vergisst.

Dankschön, ja, dankschön
für alls, was du tuast,
wenns dih a manchmal
a weng ärgern muast.

Doh mach da nix draus,
dös wird schon vergehn.
Ih find aber trotzdem
mia habns wirklih schön.

Ih werd ah recht brav sei,
des versprich ih da echt,
woaß net recht wia lang -
drum genieß es nur recht.

Und zum Schluss kriegst von mir
nuh so an richtign Schmatz:
Dankschön, liebe Mama,
du bist echt a Schatz!